



14. oktoberi 2016

UKA2016/69

Inissianik attartortitsisarneq pillugu Inatsisartut peqqussutaata nr. 2, 12. maj 2005-imeersup UPA 2017-mi allanngortinneqarnissaa pillugu Naalakkersuisut suliniuteqaqqullugit inatsisartut aalajangiiffigisassaattut siunnersuut. Taamaaliornikkut atorfillit atatillugu inigisap sivikinnerpaamik ukiuni tallimani attartoreerneratigut attartortup naliginnaasumik attartukkatut inigilersinnaaqqullugu. (Inatsisartunut ilaasortaq Anthon Frederiksen, Partii Naleraq)

Inatsisartunut ilaasortaq Anthon Frederiksen Partii Naleraq Upernaakkut 2016 siunnersuuteqarpoq tassalu inissianik attartornermi inatsisartut peqqussutaata allanngortinnissaa pillugu isumaliuutissiisut saqqummiussa qqaaseqarfigissavarput.

Nunatsinni ineqarnikkut aaqqissuussaaneq qiviaraanni ilarpassuaqarpugut atorfik malillugu ineqartitaasunik. Tamannalu soorunami ajunngikkaluaqaaq, kisiannili tassa ilaatigut suliffimmi suleqatigiinnerit pitsaanngitsut pissutigalugit suliffik qimakkusukkaluarlugu qimanneqarsinnaanngilaq tassalu suliffiit amerlasuut sulisumik sulineranni ineqartitsisarmata.

Uanilu suliffik pillugu ineqarnermut pituttuineq ukiut 7-it atuukkaluartoq ukiunut 5-nut sivikillineqarnissaanik ataatsimiititaliap isumaqatigiissup innersuussutaa tamakkiisumik taperserlugu nuannaarutigaarput.

Ilaatigummi atorfillit ukiorpassuarni atorfilittut inigisimasatik soraarninngornerminni qimattariaqartarpaat massakkullu uani peqqussummi periarfissaqalissapput inigisaminnik tigummiinniinnarnissaminnik tamannalu aamma nuannerpoq.

Nunatsinni inissaaleqineq annertoqaaq taava siunissami nalilersortariaqarparput ilanngullugu ilumut tikisitagut tamaasa inissaqartittuannassavaguut? Tassami nunaqavissut inissaaleqinerat taamak annertutigisoq isumaqarluinnarpugut inissialiornerit amerlanerpaat maani nunaqavissunut sangutinniartariaqartut.

Partii Naleqqamiit isumaqarpugut avataaniit suliartortut ilaasa namminneq inissaqarnissartik isumagissalissagaat, soorunami pisariaqartitagut assersuutigalugu nakorsat allallu pisariaqartinnerpaasagut atorfik naapertorlugu inissaqarnissaat apeqqusinngilarput.

Taamatut oqaaseqarluta Anthon Frederiksen-ip siunnersutaa tamakkiisumik akuersaarneqarnera nuannaarutigalugu qujassutigaarput.

Hans Enoksen